

կ'անցնին յԵւրոպա, որոց արժանաւոր առաջնորդը « Գաւազանն բարկութեան Երկնից » Ատտիլաս, ի ճանապարհին այլ շատ քաղաքներ ենթարկելով թէոդոսիոյ ճակատագրին՝ կը հասնի Իտալիա:

Հարիւր և աւելի ևս տարիներ, թէոդոսիա, նոյն և ամբողջ Տաւրիա՝ աւերակաց ներքև կը մնան:

501 ին կ'արշաւեն ի Տաւրիա յԱսիոյ Ուզրացիք և Բուլղարք. սոցա կարճատև տիրապետութեան վերջ կուտայ կայսրն Յուստիանոս Ա. դարձեալ զՏաւրիա Հռովմայեցւոց իշխանութեան ենթարկելով. ծովահայեաց շատ տեղուանք կայսեր շինել տուած բոլորածև բերդերուն, նոյն ձևով, աշտարակները ցարդ կանգուն կեցած են¹:

Ի վերջին կէս Է դարու՝ մի նոր ժողովուրդ ևս մուտ կը գործէ ի Տաւրիա, Կազար կամ Խազար անուամբ: Այս ազգը, համեմատ իւր երկրագործ բարուց, երկար միջոց ժամանակի կը տիրէ Տաւրիոյ դաշտային մասանց և Սրի դռնէն ևս դուրս կ'ընդարձակէ իւր իշխանութիւնը. տակաւ կը բազմանան սոքա, այնպէս որ Տաւրիա, փոխելով անունը Կազարիա (Ghazaria) կամ Խազարաց աշխարհք կը կոչուի: Սոցա շահաստանը կը լինի մօտ այժմեան հին Ղրիմու, Կազարաթ, երբեմն կոչուած մեծ աւանը. մեք այժմ այդ մեծ աւանին սակաւաւոր նշխարք կամ մնացորդք միայն կարող եմք նշմարել, ի հին-Ղրիմէ ցՍուտաղ տանող ճանապարհին վերայ, և այն գետնին հաւասարած հիմունք և քարինք հին շէնքերու, որք մօտաւոր ա-

1. Ինչպէս ի Հալուչա, Ղրիմու հարաւային ափանց վերայ: